

## Morning Dogri (NSD) National News Bulletin 25-03-2025

### आकाशवाणी

- भारत ने मेक इन इंडिया पैहलकदमी शुरू होने मगरा थमां 2023–24 तोड़ी मुल्ये च तैआर रक्षा उत्पादन च सर्वोच्च प्रगति हासल कीती ऐ।
- केन्द्री मंत्री जितेन्द्र सिंह होरें माइक्रो बैक्टीरियम ट्यूबर क्लासिस दे 10 जहार आइसोलेट्स दी जिनोम सिक्वेसिंग पूरी होने दी घोषणा कीती ऐ।
- भारतीय जनता पार्टी दी अगुआई आहली सरकार दिल्ली विधानसभा च 2025–26 दा बजट पेश करोग।
- गाजा च चला'रदे तनाजे गी घटाने दे प्रयास च मिस्र नै नमां प्रस्ताह दित्ता ऐ जे इजराइल ते हमास बश्कार युद्धविराम ब्हाल कीता जाई सकै।
- फुटबाल च भारत दी राष्ट्र टीम दा अज्ज संजा मैघालय दी शिलांग थाहर जवाहर लाल नहेरू स्टेडियम च एएफसी एशियन कप 2027 दे क्वालीफायर दे त्रीए गेड़ दे मैच च बंगलादेश कन्नै मकाबला होग।
- आईपीएल क्रिकेट च जंदी रातीं विशाखापट्टनम दे वाई.एस.राजाशेखरा रेड्डी क्रिकेट स्टेडियम च दिल्ली कैपिटल्स नै खीरी ओवर तोड़ी चलै रोमांचक मैच च लखनऊ सुपर जायंट्स गर इक विकेट कन्नै हराई दित्ता।

<><><><><><>

### India Defence

भारत ने मेक इन इंडिया पैहलकदमी शुरू होने मगरा थमां 2023–24 तोड़ी मुल्ये च तैआर रक्षा उत्पादन च रिकार्ड इक्क लक्ख 27 जहार करोडरुपे दा इजाफा दर्ज कीता ऐ। रक्षा मंत्रालय नै आखेआ ऐ जे रक्षा उत्पादन च 2014–15 व 46 जहार 429 करोड़ रुपे थमां 174 फीसदी दा बाद्धा दर्ज कीता गेआ ऐ। मंत्रालय नै आखेआ जे इक समें विदेशी स्पलाई उपपर निर्भर करने आला भारत अज्ज मुख्य च तैआर रक्षा समेयान कन्नै अपनी फौज गी मजबूती प्रदान करा करदा ऐ। रक्षा मंत्रालय नै आखेआ ऐ जे रक्षा निर्यात 2013–14 च 686 करोड़ रुपे थमां 2023–24 च 30 गुणा बधियै 21 जहार करोड़ रुपे तोड़ी पुज्जी गेदा ऐ।

<><><><><><>

Jatinder Singh-TB

केंद्री मंत्री डॉ. जितेंद्र सिंह होरें अज्ज नमीं दिल्ली च विश्व टी.बी दिवस 2025 दे मौके पर माइक्रो वैक्टीरियम ट्यूबर कुलोसि दे 10 ज्हार आइसोलेट्स दी जीनोम सीक्वेंसिंग पूरी होने दी घोषणा कीती। इस पैहल दा उद्देश्य जीनो मिक्स ते आर्टिफिशल इंटेलीजेंस दा इस्तेमाल करिये टी.बी च दोआई प्रतिरोध दी समस्या कन्नै निब्बड़ना ऐ। जितेंद्र सिंह होरें दस्सेआ जे सरकार दा लक्ष्य 2030 तगर टी.बी गी पूरी चाल्ली खत्म करना ऐ ते एहदे फैलने गी 90 प्रतिशत तगर घट्ट करना ऐ।

<><><><><><>

Delhi Budget Session

भारतीय जनता पार्टी दी अगुआई आहली सरकार दिल्ली विधानसभा च 2025–26 दा बजट पेश करोग। बजट पर चर्चा कल होग। अगले दिन बजट पास कीता जाग। 5 रोजा दिल्ली विधानसभा दा बजट सत्र कल शुरू होआ हा। कल कैंग रिपोर्ट पेश कीती गई ते अज्ज बी चर्चा होग। दिल्ली दी मुख्यमंत्री रेखा गुप्ता होर कैंग रिपोर्ट पेश कीती ही।

<><><><><><>

Delhi Session

दिल्ली सरकार आम आदमी पार्टी दे पिछले कार्यकाल खलाफ श्वेत पत्र आन्नग। दिल्ली दी मुख्यमंत्री रेखा गुप्ता होरें विधानसभा च दिल्ली ट्रांसपोर्ट कारपोरेशन बारे कैंग दी रिपोर्ट उप्पर होई बैहसू मगरा एह घोषणा कीती। मुख्यमंत्री होरें कैंग दी त्रीह रिपोर्ट कल विधान सभा च पेश कीती जेहदे च डीटीसी च होइ दी माली गड़बड़िएं बारे दस्सेआ दसाया गेदा ऐ।

<><><><><><>

President- Odisha

राष्ट्रपति द्रौपदी मुर्मू होरें आखेआ जे आदिवासी ग्राएं पिंडे च डांचागत सुविधाएं च सुधार लेई सबै गैह पुट्टा'रदी ऐ जेहदे च उच्च म्यार आली शिक्षा, महारत विकास ते मोबाइल नेटवर्क च सुधार शामिल ऐ। ओडिशा दे नयागढ़ जिले दी कालियापली थाहर भारतीय विश्ववासु छबरा समाज दे स्थापना दिवस समारोह च बोलदे होई राष्ट्रपति होरें आखेआ जे आदिवासिएं गी केन्द्र सरकार आस्सेआ शुरू कीती गेदी सगै योजनाएं दा लाह चुक्कियै आत्म निर्भर बनने दी लोड़ ऐ।

राष्ट्रपति होरें आखेआ जे टकोहदी असुरक्षत आदिवासी ग्रुपें गी बी मुख्यधारा कन्नै जुड़ियै 2047 तोड़ी भारत गी विकसित बनाने दे लक्ष्य गी हासल करने च मदद करनी चाहिदी। एह्दे थमां पैहले राष्ट्रपति होरें नयागढ़ जिले दी काटिलो थाहर प्रसिद्ध श्री निलामाढाबा मंदर दे दर्शन कीते। राष्ट्रपति होरें दो दिनें लेई ओडिशा दे दौरे पर गेदियां न।

<><><><><><><><>

## Gaza- Conflict

मिस्र नै इजराइल ते हमास बश्कार युद्ध विराम गी ब्हाल करने दे मकसद कन्नै इक नमां प्रस्ताह रखेआ ऐ। इसी चला'रदे गाजा संघर्ष च तनाह गी घट्ट करने दी कोशश दे तौर पर दिक्खेआ जा'रदा ऐ। मिस्र दी योजना बंधक बनाए गेदे लोकें दी रिहाई ऐ। एह्दे तैहत हमास गी हर हफ्ते 5 इजराइली बंधकें गी रिहा करने दा प्रस्ताह रखेआ गेआ ऐ। प्रस्तावित रूपरेखा मूजब बंधकें दी रिहाई दे शुरूआती हफ्ते दे मगरा इजराइल युद्ध विराम दे दुए गेड़ गी लागू करोग। सुरखा सूत्रें दस्सेआ ऐ जे अमरीका ते हमास नै इस प्रस्ताह लेई हामी भरी ऐ पर इजराइल दे जवाब गी बलगेआ जा'रदा ऐ। एह प्रस्ताह पिछले मंगवारें भड़की दी हिंसा गी दिक्खदे होई आया ऐ। जिसलै इजराइल नै हमास खलाफ जमीनी हमले परतियै शुरू करी दित्ते हे।

<><><><><><><><>

## Russia- India

रूस दे विदेश मंत्री सरगे लावरोव होरें आखेआ ऐ जे रूस भारत कन्नै खास अधिकार हासल रणनीतिक साझेदारी विकसित करा'रदा ऐ। सरकारी मीडिया कन्नै लावरोव दे हवाले कन्नै आखेआ जे रूस, चीन, भारत, ईरान, उत्तर कोरिया ते राष्ट्रमंडल दे आजाद मुख्य जनेह देशें कन्नै सक्रिय रूपै कन्नै सरबंधे दा विस्तार करा'रदा ऐ। अलेक्जेंडर गोर्चाकोव पब्लिक डिप्लोमेसी फंड दे न्यासी बोर्ड दी बैठक च लावरोव होरें आखेआ जे रूस दुनिया दे ज्यादातर मुल्यें कन्नै सरबंध गी बढ़ावा देने गी तरजीह दिंदा ऐ।

<><><><><><><><>

## PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” च इस बारी 30 मार्च गी देश विदेश च रौहने आले श्रोताएं कन्नै बचार सांझे करगन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

## IPL

आईपीएल क्रिकेट च जंदी रातीं विशाखापट्टनम दे वाई.एस.राजाशेखरा रेड्डी क्रिकेट स्टेडियम च दिल्ली कैपिटल्स नै खीरी ओवर तोड़ी चलै रोमांचक मैच च लखनऊ सुपर जायंट्स गी इक विकेट कन्नै हराई दित्ता। लखनऊ सुपर जायंट्स आस्सेआ दित्ते गेदे 210 रंज दे लक्ष्य दा पिच्छा करदे होई दिल्ली कैपिटल्स नै 19.3 ओवरें च 211 रंज बनाइयै मकाबला जित्ती लैता। आईपीएल मैच अज्ज संजा गुजरात टाइटंस दा मकाबला पंजाब किंग्स कन्नै होग। एह मैच गुजरात दे नरेन्द्र मोदी स्टेडियम च संजा साढ़े 7 बजे शुरू होग।

<><><><><><>

## Football

फुटबाल च भारत दी राष्ट्र टीम दा अज्ज संजा मैघालय दी शिलांग थाहर जवाहर लाल नेहरू स्टेडियम च एएफसी एशियन कप 2027 दे क्वालीफायर दे त्रीए गेड़ दे मैच च बंगलादेश कन्नै मकाबला होग। एह मैच संजा 7 बजे मेघालय च शिलांग दे जवाहर लाल नेहरू स्टेडियम च खेड्डेआ जाग।

एह्दे थमां पैह्ले भारतीय टीम नै पिछले बुधवारें इक अंतर्राष्ट्रीय मैत्री मैच च मरलद्वीप पर  
त्रै-सिफर कन्नै शानदार जित्त दर्ज कीती ही।

<><><><><><>